

# NARONA

## Musa takada siigõdee

Isarailinõ kuuna gbáan 9:1-14:45, 20:1-21:35  
Balamu 22:1-24:25

### 9

#### *Banla zĩbaakena*

<sup>1</sup> Dii yã ò Musane Sinai gbáan Isarailinõ bõna Iyipiti wè plaade mɔ káaku guu à bè: <sup>2</sup> Isarailinõ gae Banla zĩbaa ke à gurɔɔa. <sup>3</sup> À zĩbaa pì ke mɔɔ kèkii gurɔ gērodosaideen uusie. À ke lán má dàare nà píngi kɔn à dokayá kè má dàareenɔ.

<sup>4</sup> Musa ò Isarailinõne aɔ Banla zĩbaa ke, <sup>5</sup> ben aɔ zĩbaa pì kè Sinai gbáan mɔ káaku gurɔ gērodosaideen uusie. Aɔ kè lán Dii ò Musane nà píngi. <sup>6</sup> Gbēkenɔ kú gwe aɔ gbāsĩ kè aɔ ɔ kè gèa yānzi, ben aɔe e wà Banla zĩbaa kè zĩ beeeero. Ben aɔ gàa wà Musa kɔn Arunao lè zĩ beeeea gɔɔ <sup>7</sup> aɔ bè Musane: Gè yã musu wa gbāsĩ lè. Bóyānzi wà gìwe wà mɔ kɔn gbaanɔ Diine kɔn wa gbēnɔ à gurɔɔazi? <sup>8</sup> Musa wènlá à bè: À ze ai mà ma lán Dii é o a yã musu nà. <sup>9</sup> Ben Dii bè Musane: <sup>10</sup> N̄ o Isarailinõne, tó aɔ gbēkenɔ ke aɔ boriinɔ kpé gbāsĩ gè yã musu, ke aɔ gàa wéte zàazā ken, aɔé fɔ wà Banla zĩbaa kemε zāa. <sup>11</sup> Mɔ plaadee gurɔ gērodosaidee uusien aɔé zĩbaa pì ke. Aɔé sã n̄bɔ só kɔn buredi sése'ēzēsaio kɔn lá kyàkyāo. <sup>12</sup> Aɔton à ke tó guu d̄aro bensɔ aɔton s̄aa pì wá ke éro. Aɔé Banla zĩbaa pì ke lán má dìeare nà píngi. <sup>13</sup> Gbē kè èe gbāsĩ léro bensɔ èe gá wéte kearo, tó à gì Banla zĩbaa

pì kezi, wà adee bo a gbēno té, zaake èe mómme kōn gbaao à gurɔɔaro. À taari é wí à musu. <sup>14</sup> B̀amɔ k̀e kú a té bens̄o à yezi à Banla zĩbaa kemε, séde à ke lán ma à doka dīare nà. B̀amɔ kōn b̀edeo n̄ píngi yã d̄nkōmε.

*Téluguu dana bisakutaalaa*  
(B̄n 40:34-38)

<sup>15</sup> Zĩ k̀e wà bisakutaa mò d̀o, téluguu pì dà s̀eda kutaa pìla. Zaa uusie ai guu g̀aa à d̀o téluguu pì kú kutaa pì musu lán té bà. <sup>16</sup> Len èḡo kuu le gurɔ píngi, èḡo kú kutaa pìla fáant̄ε, gwãavĩ s̄o lán té bà. <sup>17</sup> Tó à g̀o kutaa pìla, ben Isarailino è fεε kōn táo. Guu k̀e téluguu pì z̄en, gwen āε b̀ura káen. <sup>18</sup> Tó Dii òd̄oáñne le, āε b̀ura fεε. Tó à òd̄oáñne d̀o, āε εara wà b̀ura káε. Tó téluguu pì da kutaa pìla s̄o, āε b̀ura èḡo kaename. <sup>19</sup> Tó téluguu pì e gurɔ plaaa keε kutaa pìla, āεḡo Dii yã maa, āε b̀ura fεero. <sup>20</sup> Zĩkenɔa téluguu pì è gurɔ plaaa ke kutaaloro. Tó Dii òd̄oáñne, āε b̀ura káε, tó Dii εara à òd̄oáñne d̀o, ben āε b̀ura fεε. <sup>21</sup> Zĩkenɔa s̄o téluguu pì è ze gu d̄nk̄o féte zaa uusie ai k̄ngɔ. Tó à g̀o k̄ngɔ, ben āε b̀ura fεε. Fáant̄ε ke gwãavĩn yoo, tó téluguu pì g̀o, āε b̀ura fεεmε. <sup>22</sup> Tó téluguu pì g̀o zena kutaa pìla gurɔ do ke m̀o do ke ẁe don yoo, āεḡo kaena b̀urammε, āε fεero. Tó à g̀o, ben āε b̀ura fεε. <sup>23</sup> Āε b̀ura káε ke wà b̀ura fεε Dii lé saero. Āεḡo Dii yã maa lán à dà Musane à òñne nà.

## 10

*Kondogi kákaki m̀en plaaano*

1 Dii yā ò Musanε à bè: 2 Ñ kākāki pi mèn plaa kōn kondogi kè wà gbègbē maamaaaο gbēno kakōabο ũ le aōgae bura fεε. 3 Tó wà kākāki pino pè, gbēno é mó wà kakōanzi ń píngi dakōreki kpeεεa. 4 Tó kākāki mèn doon wà pè, Isaraili bori don'aεdee kè aō de kí ũuno bé wé mó wà kakōanzi. 5 Tó wà kākāki pino pè sikōkenao, gbē kè aō bura kú ofāntēbοε kpaano bé wé bura fεε káaku. 6 Tó wà à gèn plaadee pè sikōkenao, gbē kè aō bura kú soomεε kpaano bé wé bura fεε. Kākākipena sikōkenao pin gbēno dana zén sèeda ũ. 7 Tó wà yezi wà gbēno kakōa, wāgae pé sikōkena sai.

8 Aruna né sa'orino bé wé kākāki pino pé. Eégō deare doka ũ guro píngi, apino kōn a boriino. 9 Guro kè a ka a busun, tó ée gaa zī ká kōn a ibεε kè aōé gà wà fεεaono, àgae kākāki pino pé sikōkenao, le a yā e à do mamoma Dii a Ludan, mé a bo a ibεε pino ozi. 10 Guro kè ée ponnaa keε sō, zībaan yoo, mo dufu guro káaku zīn yoo, àgae kākāki pino pé a sa'opo kè wè ká tén à té kūnoa kōn a sáabukpana sa'opono, a yā é domagu. Mámbe Dii a Luda ũ.

### *Isarailino fεεna Sinai*

11 Wè plaade mo plaade guro barodee zī, téluguu gò sèeda kutaala, 12 ben Isarailino bura fεε Sinai gbáan, aōe sōki kpákpaai ai téluguu gaa à zè Parani gbáan. 13 Aō bura fεεna káakun gwe. Aō kè lán Dii dà Musanε à ónne nà.

14 Yuda zìkpeεno bé wà bura fεε gāli kōn gālio káaku kōn ń tuutao. Aminadabu né Nasōn ń don'aεdee ũ. 15 Zua né Netanelin Isaka zìkpeεno don'aεdee ũ. 16 Eloni né Eliabun Zebulun zìkpeεno

dɔn'aɛdee ũ. <sup>17</sup> Gɛsɔnu boriinɔ kɔn Mɛrari boriinɔ kutaa pì gbòro, ben aɔ sè wà dào zén.

<sup>18</sup> Ben Rubeni zìkpɛɛnɔ bùra fɛɛ gáli kɔn gálio kɔn ñ tuutao. Sedeu né Elizun ñ dɔn'aɛdee ũ. <sup>19</sup> Zurisadai né Selumielin Simɛɔ zìkpɛɛnɔ dɔn'aɛdee ũ. <sup>20</sup> Deweli né Eliasafan Gada zìkpɛɛnɔ dɔn'aɛdee ũ. <sup>21</sup> Ben Koa boriinɔ Luda pónɔ sè wà dào zén. Wà kutaa pì dɔ ai aɔgɔ ká.

<sup>22</sup> Ben Eflaimu zìkpɛɛnɔ bùra fɛɛ gáli kɔn gálio kɔn ñ tuutao. Amiudu né Elisaman ñ dɔn'aɛdee ũ. <sup>23</sup> Pedazu né Gamalielin Manase zìkpɛɛnɔ dɔn'aɛdee ũ. <sup>24</sup> Gideoni né Abidán Beyāmi zìkpɛɛnɔ dɔn'aɛdee ũ.

<sup>25</sup> Ben Dani zìkpɛɛnɔ bùra fɛɛ gáli kɔn gálio kɔn ñ tuutao. Aɔmbe aɔègɔ té kpɛɛ. Amisadai né Ayezana dɔn'aɛdee ũ. <sup>26</sup> Okorana né Pagielin Asa zìkpɛɛnɔ dɔn'aɛdee ũ. <sup>27</sup> Enana né Airan Nafatali zìkpɛɛnɔ dɔn'aɛdee ũ. <sup>28</sup> Lán Isarailinɔ è bùra fɛɛfɛɛ wàgɔ tétɛkɔzi nà n gwe gáli kɔn gálio.

<sup>29</sup> Obabun Musa anzure Rueli né ũ, Midiā boriimɛ. Musa bèɛ: Wée daa zén gana bùsu kè Dii bè é wa gbaan. Ñ mó ñ gáwao, wé yā maaa kenne, zaake Dii nnamana gwe lé gbèwe. <sup>30</sup> Ben à bèɛ: Mé gáro, mé ɛara ma bùsun ma bɛdeɛnɔ kiiamɛ. <sup>31</sup> Musa bè: N yā nna. Ñton wa tónlo, zaake ñ bùrakaeki maaa dɔ bensɔ mbe né kɛ wa wéɛdee ũ. <sup>32</sup> Tó n gaawao, wé yā maaa kè Dii é kɛwee kenne se.

<sup>33</sup> Isarailinɔ bùra fɛɛ Dii kpìii saɛ aɔ táa ò gurɔ aagɔ. Wà dɔ aɛ kɔn Dii bà kuunañyo àkpatio lɛ à bùrakaekii ɔɔaíne. <sup>34</sup> Tó aɔ fɛɛ wà dà zén, Dii

téluguu pì ègõ kúnla fáantě. <sup>35</sup> Tó wà dà zén kǝn àkpatio, Musa è be:

Ñ fεε Dii, lε n ibεεnɔ fáakǝa,  
lε n zangurinɔ bàa lénne.

<sup>36</sup> Tó wà dìε, Musa è be:

Dii, n̄ ɛara n̄ su Isaraili bɔɔɔ ũgbangbanɔa.

## 11

### *Dii téfεεna*

<sup>1</sup> Isarailinɔ zɔka kà Diizi n̄ nawěakena yānzi. Kè Dii mà, à pɔ fě, ben à té fεε n̄ té, aǝ bùra kpadoo té kũ.

<sup>2</sup> Ben gběnɔ wii pè Musazi. Kè à wée kè Diia, ben té pì zè. <sup>3</sup> Ben wà tó kpà guu pìne Tabera, kè Dii té fεε n̄ té gwe yānzi.

### *Dii bùrunɔ gbarεna*

<sup>4</sup> Bori pāndenɔ kú Isarailinɔ té, aǝe pǝble pānde nii dεε, ben Isarailinɔ e ɔɔ dɔɔ se wà bè: Mán wé nòbɔ en wà sóo? <sup>5</sup> Wée kpò kè wá sò Igipiti wa pɔyezia bege kεε kǝn plěɔ kǝn gbεzεεnɔ kǝn εfɔnɔ kǝn aubasanɔ kǝn aubasa gizonɔ. <sup>6</sup> Tia sa wa lé gà, zaake weè pǝke ero, tó èe ke mana kè baasiro.

<sup>7</sup> Mana pì wée kete, à dε lán lí'ɔɔ bàme. <sup>8</sup> Isarailinɔ è sée wà ló gbèn ke aǝè zǝ gón. Aǝè disa wà kàra keo. À nna lán kàra tēngo bà. <sup>9</sup> Tó kpíi kpà bùran gwāavĩ, ben mana pì è kwé se.

<sup>10</sup> Musa mà wée ɔɔ dɔɔ uale kǝn ualeo. Dii pɔ fě maamaa, ben à kè Musane ïi <sup>11</sup> à bène: Bóyānzin née wée tāamazi? Ma yā kperee bé à kenne zaa, ben n gbě pìnɔ gwana asoo dìmεε? <sup>12</sup> Mámbe ma gbě pìnɔ nò sís? Mámbe ma n̄ ís? Bóyānzi n bème mà n̄ kú kpεε lán nédandee bà mà gányo bùsu kè

13 **Mákpan mé nòbò en mà kpá gbě pìnɔa n pínɡii? Zaake aɔɔe wii pɛemazi wèe bee mà n gba nòbò wà só.** 14 **Mé fɔ mà gbě pìnɔɔ kú kɛɛ n pínɡi madoro, zaake aɔ asoo demala.** 15 **Tó len né kemε le, n tó ma n pɔnnaa e n ma de gɔɔ. Nton tó mà nawɛa pì ke dɔro.** 16 **Ben Dii bène: N Isaraili gběnsi kè n n dɔn'aedee ũuno kakɔa gɔɔn baaagɔ akuri n mɔnyo dakɔreki kuta kiia aɔgɔ kúnyo gwe.** 17 **Mé pita mà yá onne gwe mà a Ninii kè kúmmaa kpadoo go mà diinne, aɔé gběno gwana aso sényo le ntongɔ n sɛna ndo dɔro yānzi.** 18 **N o gběnoe aɔ gbāsī bɔ n zīndan zia yānzi, aɔé nòbò e wà só. Zaake aɔ wii pɛemazi wà bè, mán wé nòbò en kè wà só? Aɔ bè wà sàò Igipiti. Beee yānzin mé n gba nòbò aɔ sózi.** 19 **Aɔé só èe ke gurɔ donlo, gurɔ plaanlo, gurɔ sɔɔronlo, gurɔ kurinlo, gurɔ baronlo.** 20 **Aɔé só mɔ do gbāngbān ai à bɔ n yīn à nii bɔ n pɔɔ guu. Zaake mamɔma Dii má kú n té, ben aɔ pā kpāmazi. Aɔ zɔka dɔma wà bè, bóyānzi wà bɔ Igipitizi?** 21 **Ben Musa bè: Gɔgběno kúmao tá guu gɔɔn bɔɔ wàa aagɔ, ben n bè né nòbò kpámma wà só ai mɔ do gbāngbān-sɔ?** 22 **Baa tó wà sáano kɔn zùnɔ dède paripari, eé mómmaɔ? Tó wà ísia kpòno sèe pínɡi, eé mómmaɔ?** 23 **Dii wèala à bè: Ma gbāaa é kánloo? Né e tia, tó yā kè má ònne é ke ke eé kero.**

24 **Musa bɔ à Dii yā pìnɔ ònne. À Isaraili gběnsino kàkɔa gɔɔn baaagɔ akuri à n zé wà līga kutaa pìzi.** 25 **Ben Dii pìta téluguu guu à yā òo. À a Ninii kè kúa kpadoo gò à di gběnsi gɔɔn baaagɔ akuri pìnɔne. Kè à a Ninii pì diinne le, aɔ annabikεε kè, beee gbera aɔɔe ɛara wà kè dɔro.** 26 **Gbě kè Musa n sé gɔɔn**

plaaano gò büran, gbẽ doo tón Elɛdada, gbẽ doo sɔ Mɛdada. Aɔɔe gá kutaa kiiaro, mɔde Ninii pì sùrúma se, ben aɔ annabikɛɛ kè büran. <sup>27</sup> Gɔkpare ke bàa lè à gàa à bè Musanɛ: Elɛdada kɔn Mɛdadao e annabikɛyã oo büran. <sup>28</sup> Nuni né Yɔsuan Musa kpàasi ũ zaa a òwazikɛgurɔ, ben à bè: Baa Musa, ñ gínɛ. <sup>29</sup> Ben Musa bènɛ: Néɛ nòsɛgɔaano kɛényo ma yã musun yó? Tó Dii a Ninii dì a gbɛnɔnɛ aɔ gò annabinɔ ũ ñ píngi, à maaroo? <sup>30</sup> Ben Musa èara büran kɔn Isarailinɔ gbɛnsi pìnɔ.

<sup>31</sup> Dii tò ïa bò ísɪaa kpa à mò kɔn bürunɔ, aɔ dà bürala. Aɔ lɪga bürazi baama píngi à kà tágurɔ doo ũ, bensɔ aɔ vïana lezĩ kà gàsásuu plaa. <sup>32</sup> Fãantɛ beea kɔn gwãavĩo kɔn à gu làa donao aɔ fɛɛ wà gàa wà bürunɔ kùkù. Gbẽ kè èe kùkù bítaroo kùkù sùu baro. Ben aɔò fãe à gàga. <sup>33</sup> Kè aɔ à nòbɔ dà ñ lén gɔɔ, aɔɔe e wà só bítaroo, ben Dii pɔ fɛ́nzi à gagyãa kàngu. <sup>34</sup> Ben wà tó kpà guu pìnɛ Lóudeenɔ Mira, zaake gwen wà gbẽ kè nòbɔ lóu ñ kúnɔ vïin. <sup>35</sup> Ben Isarailinɔ fɛɛ gwe aɔ gàa Azero aɔ gurɔplaa kè gwe.

## 12

### *Miriamu kɔn Arunao Musa taari'ena*

<sup>1</sup> Miriamu kɔn Arunao Musa taari è Etiopia nɔ kè à sè yã musu, zaake à Etiopia nɔ sè. <sup>2</sup> Aɔ bè: Musa adon Dii dìe à yã ò à gāzĩ? Èe o wa gāzĩ seroo? Dii yã pì mà. <sup>3</sup> Musa né gbẽ busɛmɛ, à sáa kú anduna guuro. <sup>4</sup> Gwe gɔɔ Dii bè Musa kɔn Arunao kɔn Miriamuonɛ: À bɔɛ à gá dakɔrɛki kuta kiia a gɔɔn aagɔa. Ben aɔ gàa ñ gɔɔn aagɔa ñ píngi. <sup>5</sup> Dii pìta téluguu guu à zè kutaa pì kpɛɛɛa. À Aruna

kõn Miriamuo sìsi, ben aõ sòzi nì plaa nì píngi. <sup>6</sup> À bèhne: À ma yā ma. Tó ma annabi kee kú a té, meè bɔ mà mózi wéegupu guu meè yā one nanaa guume. <sup>7</sup> Mòde à de le kòn ma zòbleri Musaoro. Zĩkeri náanedeeme ma ua gbẽno té nì píngi. <sup>8</sup> Weè yā bɔ kō lén. Meè yā one mà à ke utenero. È wéé si ma takalé. À kè dia ée ma zòbleri Musa taari'ena vĩa keroo? <sup>9</sup> Ben Dii pɔ fěńzi, à a taa o.

<sup>10</sup> Kè téluguu pì gò kutaa pìla, kusu dà Miriamula gɔɔ, à pura kù lán buu bà. Kè Aruna liè à à gwà, à è kusu dààla, <sup>11</sup> ben à bè Musane: N yā nna Baa! Nton tó wà mìsaiyā taarikena gbè ero. <sup>12</sup> Nton tó àgɔ de lán né kè wà ì gè à mè kpadoo yakana bàro. <sup>13</sup> Musa wii pè Diizi à bè: Luda, n yā nna! N à kēkɔa. <sup>14</sup> Ben Dii bène: Tó à de bé à lóu sù à uua, eé keke wiyā ũ ai gurɔ swéeplooroo? Wà bɔo bùra kpee gurɔ swéeplooroo gĩa, gbasa wà à sí. <sup>15</sup> Miriamu kú bùra kpee ai gurɔ swéeplooroo. Isarailinɔ e da zénlo sé kè wà èara wà à sì. <sup>16</sup> Beee gbera aõ fěé Azero aõ gàa wà bùra kàe Parani gbáan.

## 13

### *Gu'asiigwari gɔɔn kuri awéeplooroo zĩna*

<sup>1</sup> Dii bè Musane: <sup>2</sup> N gbẽno zĩ aõ gá Kanaa bùsu kè mée kpaá Isarailinɔa gwa. N nì dezinɔ bori gbè kè aõ de dɔn'aedee ũunɔ sé mèn doodo nì nì zĩ. <sup>3</sup> Ben à nì gbáe le bɔna Parani gbáan lán Dii ò nà. Gbè pìno né Isaraili dɔn'aedeenome nì píngi. <sup>4</sup> Aõ tónon yè: Rubeni boriinɔ guu Zaku né Samua, <sup>5</sup> Simeɔ boriinɔ guu Ori né Safata, <sup>6</sup> Yuda boriinɔ guu Yefune né Kalabu,



7 Isaka boriinɔ guu Yusufu né Igali,  
 8 Eflaimu boriinɔ guu Nuni né Osea,  
 9 Beyāmi boriinɔ guu Rafu né Paliti,  
 10 Zebulun boriinɔ guu Sodi né Gadieli,  
 11 Yusufu né Manase boriinɔ guu Susi né Gadi,  
 12 Dani boriinɔ guu Gemali né Amieli,  
 13 Asa boriinɔ guu Mikaeli né Setu,  
 14 Nafatali boriinɔ guu Vofosi né Nabi,  
 15 Gada boriinɔ guu Maki né Gueli.  
 16 Gbē kè Musa ní zĩ b̀usu gwaanɔn gwe. Musa tó kpà Nuni né Oseane Yɔsua.

17 Kè Musa e ní zĩ Kanaa b̀usu gwa, à bè́nne: À b̀ɔe k̄ɔn Nεgevi gbáao à di b̀usu gusĩsĩdeea. 18 À gwa lán b̀usu pì de nà, tó à gb̄enɔɔ gb̄aa kesɔ āɔ buse, tó āɔ pari kesɔ āɔ pariro, 19 tó āɔ b̀usu maa kesɔ à zaa, tó āɔ wétenɔ b̄i v̄i kesɔ à v̄iro, 20 tó à tɔɔte gb̄aa kesɔ à b̀usa, tó à líɔ v̄i kesɔ à v̄iro. À āia ke à b̀usu pì líb̄eenɔ s̄ee à suo. Zaake geepi be káakunɔ magurɔɔn yè. 21 Ben āɔ gàa wà b̀usu pì asii gwàgwa zaa Zini gbáan ai Reobo, Lebo Amata kpa. 22 Kè āɔ b̀ɔe k̄ɔn Nεgevi gbáao, āɔ kà Eblonu, guu kè Anaki boriinɔ Aima k̄ɔn Sesaio k̄ɔn Talamaio kún. Eblonu kaena Zoā kè kú Igipiti ā w̄e sw̄eplaame. 23 Kè āɔ kà Esekolu guzuren, āɔ geepi ȳɔ doo z̄̄ gwe āɔ lògo lía, ben ḡɔɔn plaaanɔ s̄ena. Āɔ biisioo k̄ɔn kākāpuraao s̄e dɔ. 24 Wà tó kpà guu p̄ine Esekolu guzure, geepi ȳɔ kè Isarailinɔ z̄̄ gwe yānzi. 25 Kè āɔ b̀usu pì yakè gurɔ baplaa, ben āɔ èara wà sù.

### *Gu'asiigwarinɔ baarukpana*

26 Kè āɔ sù Kadesi, Parani gbáan, āɔ gàa Musa k̄ɔn Arunao k̄ɔn Isarailinɔ kiia píngi. Āɔ sù k̄ɔn baaruo

Isarailinɔne ń pínɡi, ben aɔ̀ b̀usu p̀i líbɛɛnɔ̀ ò̀d̀oáɔ̀ne. 27 Aɔ̀ yá p̀i gbà Musane wà bè: Wa gaa b̀usu k̀è n wa zĩin. Zwi k̀ɔ̀n zó'io di gwe. À líbɛɛnɔ̀n yè. 28 M̀ode b̀usu p̀i deenɔ̀ gbāa. Aɔ̀ wéteɔ̀n b̄ĩ v̄ĩ bensɔ̀ aɔ̀ wéte p̀inɔ̀ bíta maamaa. Wa Anaki boriinɔ̀ è gwe se. 29 Amalekinɔ̀ kú Nɛgɛvi gbáan. Itinɔ̀ k̀ɔ̀n Yebusinɔ̀ k̀ɔ̀n Amɔ̀rinɔ̀ kú b̀usu gusĩsĩdeen, bensɔ̀ Kanaanɔ̀ kú ísɩaa sae k̀ɔ̀n Yoda saeo. 30 Kalebu gbēnɔ̀ lé ȳite Musa ae, ben à bè: Wà gá wà b̀usu p̀i sí, zaake wé f̄ɔ̀ wà z̄i bler̄mma. 31 Ben gbē k̀è aɔ̀ g̀aaonɔ̀ bè: Wé f̄ɔ̀ wà léé gbē p̀inɔ̀aro, zaake aɔ̀ gbāaa dɛwala. 32 Ben aɔ̀ b̀usu k̀è aɔ̀ yakè p̀i fabò Isarailinɔ̀ne wà bè: B̀usu k̀è wá yakè p̀i né b̀usu k̀è è a gbēnɔ̀ mómomɛ. Gbē k̀è wa ń é gweenɔ̀ ń pínɡi né gbē gbàanɔ̀mɛ. 33 Wa gbē gbàagbāanɔ̀ è gwe Anaki boriinɔ̀ ũ. Wa a z̄inda è lán babanɛnɔ̀n b̄a, len wá dɛ lɛ ń wéɛn se.

## 14

### *Isarailinɔ̀ b̀ona Dii kpɛɛ*

1 Isarailinɔ̀ e wii gbāaa pɛɛ ń pínɡi, aɔ̀ɔe óo dɔo gwāav̄i beee. 2 Aɔ̀ zɔka d̀ Musaa k̀ɔ̀n Arunao ń pínɡi wà bèɔ̀ne: Tó wa gaga Igipiti kesɔ̀ gbáan k̀è, lɛ à k̀è maa. 3 Bóyānzin Dii e taawao b̀usu p̀inzi? Weé wa dɛdɛ k̀ɔ̀n f̄ɛɛdaaomɛ, weé wa nɔ̀gbēnɔ̀ k̀ɔ̀n wa néɔ̀n k̀úkũ. Wa sɔkpana Igipiti sàɔ̀roo? 4 Ben aɔ̀ bèk̀ɔ̀ne: Wà d̀on'aedee diɛ wà ɛara wà tá Igipiti.

5 Musa k̀ɔ̀n Arunao dàe ń puua gbē pínɡi ae. 6 Ben gu'asiigwarinɔ̀ ḡɔ̀on plaa Nuni né Yɔsua k̀ɔ̀n Yefune né Kalebuo ń utanɔ̀ g̀aga wà k̀èk̀è 7 aɔ̀ bè gbēnɔ̀ne: B̀usu k̀è wa b̀ɔɛn wá yakè p̀i maa maamaa. 8 Tó wa yá kà Diine, eé gáwao b̀usu p̀in, b̀usu k̀è zwi k̀ɔ̀n zó'io

din pì, à wa gba. <sup>9</sup> Àton bɔ Dii kpɛero. Àton vĩa ke b̀usu pì deenɔnero, zaake wa blɛnɔme, aɔ utekii vĩ dɔro. Dii kúwao, àton vĩa kero.

<sup>10</sup> Baade pínɡi e bee wà ń pápa kɔn gb̀eò, ben Dii gakui b̀ò à m̀ò Isarailinɔzi dakɔreki kuta kiia. <sup>11</sup> Dii bè Musanɛ: Gb̀e p̀inɔ éɡɔ kya kaamagu gurɔ pínɡin yó? Baa kɔn dabuyá parii k̀è má k̀è ń ténɔ, aɔéɡɔ gii ma náanɛ kezi gurɔ pínɡin yó? <sup>12</sup> Mé gagyá kpánzi mà ń kaate, mé n boriinɔ ke pari, aɔ gb̀aaa éɡɔ de gb̀e p̀inɔla. <sup>13</sup> Ben Musa bè Diine: M̀be n gb̀e p̀inɔ b̀è Igipiti kɔn n gb̀aaaò. Tó Igipitinɔ mà, <sup>14</sup> aɔé gí o b̀usu k̀è deenɔneziro. Zaake aɔ dɔ k̀è ń kúwao, neè b̀ò ń m̀ówazi t̀t̀t̀nt̀. Aɔ dɔ k̀è n téluguu éɡɔ kú wa musu, neè dɔwe ae à guu fáant̀, gwáavĩ s̀ó té guu. <sup>15</sup> Tó n gb̀e p̀inɔ d̀è kãndo gɔɔ, borii k̀è aɔ yá p̀i mànɔ é be: <sup>16</sup> Dii f̀ua à gá kɔn gb̀e p̀inɔ b̀usu k̀è à la dànnɛn, beee yãnzin à ń déde gb̀aanzi. <sup>17</sup> Dii, n n gb̀aa bíta ɔɔańne sa, lán ń ò nà n bè <sup>18</sup> n pɔɔ è f̀e kpaaro, n gb̀eke vĩ bíta, neè gb̀enɔ yá zaaanɔ kɔn ń taarinɔ k̀éńne, m̀ode neè tó taaridee b̀ò pãro. Neè denɔ yá zaaanɔ wí ń boriinɔ musu ai à gá à pé ń swãkpɛenɔa kɔn ń nasionɔ. <sup>19</sup> Lán n s̀uu k̀è kɔn gb̀e p̀inɔ nà zaa Igipiti ai aɔ g̀aa wà k̀ao k̀è, n ń durun k̀éńne n gb̀eke bíta guu.

### *Zɔkakarinɔ wéetãmma*

<sup>20</sup> Ben Dii bè: Lán n wéé k̀ema nà, mé s̀uu keńyo. <sup>21</sup> M̀ode lán meéɡɔ kuu nà bens̀o ma gakui dà an-dunala pínɡi, <sup>22</sup> gb̀e k̀è aɔ ma gakui è kɔn dabuyá k̀è má k̀è Igipiti kɔn gb̀aa guuo k̀è aɔ ma ɛ wà ma gwa g̀en kuri aɔ gí ma yá mazinɔ, <sup>23</sup> ń gb̀eke é wéé si b̀usu k̀è ma la dà ń dezinɔne p̀ilero. Gb̀e k̀è aɔ kya kãmaguunɔ ke é wéé siãlero. <sup>24</sup> Lán ma z̀òbleri

Kalebu nòse b̀ò ado nà, à t́emazi k̀õn ǹòseo do, mé t́o à g̀ẽ b̀usu k̀è à g̀aan p̀i guu, à boriiǹo é e t́ubi ũ. <sup>25</sup> Zaake Amalekiǹo k̀õn Kanaaǹo kú guzuren gwe, à ɛara à da gbáa zén zia Isia T́eaa kpa.

<sup>26</sup> Dii bè Musane k̀õn Arunao: <sup>27</sup> Gbẽ zaaa k̀eǹo é zoka kámazi gur̀o p̀ingín ýó? Ma zoka k̀è àõe kaamazii mà. <sup>28</sup> Ǹ beńne mam̀oma Dii ma bè má kuu. Lán àõ wée k̀ema nà, len mé keńne ɛ. <sup>29</sup> Àõ g̀eǹo é g̀õ kaena gbáan k̀è, àõ gbẽ k̀è àõ kà wè baro ke deàlaano p̀ingi. Àõ gbẽ k̀è wà ǹ náro bens̀o àõ zoka kámaziiǹo <sup>30</sup> é g̀ẽ b̀usu k̀è ma à lé gbèńnenlo, séde Yefune né Kalebu k̀õn Nuni né Ỳosua baasiro. <sup>31</sup> Àõ né k̀è àõ bè weé ǹ k̀ukúǹon mé g̀eńyo, ɛ àõ b̀usu k̀è ǹ deǹo g̀izi p̀i nnaa ma. <sup>32</sup> Àõpiǹo s̀õ, àõ g̀eǹo é g̀õ kaena gbáan k̀eme. <sup>33</sup> Àõ néno é p̀ono dádá gbáan k̀è ai wè baplaa, àõ ǹ deǹo náane sai gbè e. Àõ deǹo g̀eǹo é g̀õ gbáan k̀è ǹ p̀ingi. <sup>34</sup> Lán wà b̀usu p̀i yakè gur̀o baplaa nà, len àõégõ ǹ yá zaaa gbè e ɛ ai wè baplaa, wè doodo gur̀o doodo, àõégõ d̀õ lán íbetekpanamao de nà. <sup>35</sup> Mam̀oma Dii mámbe ma yá p̀i ò, ɛme s̀õ mé ke gbẽ zaaa k̀è àõ kákõamazii p̀iǹone ɛ. Àõé gaga gbáan k̀è ǹ p̀ingi.

<sup>36</sup> Gbẽ k̀è Musa ǹ zĩ àõ b̀usu yakè k̀è àõ s̀u àõ kya kà b̀usu p̀iǹ àõ t̀ò wà zoka d̀ano, <sup>37</sup> Dii gagyáa kà gbẽ p̀iǹon, ben àõ g̀aga. <sup>38</sup> Gbẽ k̀è àõ g̀aa wà b̀usu yakè p̀ino t́e, Nuni né Ỳosua k̀õn Yefune né Kalebuo bé wà g̀õ wèndio.

<sup>39</sup> Musa yá p̀ino t̀õkè Isarailiǹone p̀ingi, ben àõ ́o d̀o maamaa. <sup>40</sup> Àõ f̀e kongo id'e'id'e, àõ m̀i p̀è kpíiiǹo àõ bè: À gwa, wée gaa guu k̀è Dii òn. Wa wa durun d̀õ sa. <sup>41</sup> Musa bè: B́oyánzi ée ṕaa Dii yánezi? Beee

é sí kero. <sup>42</sup> Àton gáro, zaake Dii kúaoro. A ibeeno é zì bleawa. <sup>43</sup> Amalekinɔ kɔn Kanaanɔ kú a ae gwe. Aɔ́é a dede kɔn fɛɛdaao. Dii égɔ́ kúaoro, kè a gi tézizi yānzi. <sup>44</sup> Ben aɔ́ wada yā kè aɔ́ mì pè kpiiinɔa, baa kè Dii bà kuunańyo àkpati gɔ́ b̀uran kɔn Musao. <sup>45</sup> Ben Amalekinɔ kɔn Kanaa kè aɔ́ kú gusĩsĩdee pinnɔ lèem̃ma aɔ́ zì blèr̃ma wà pèr̃ma ai ɔ́ma.

## 20

### *Í bɔna gbèn* (Bɔn 17:1-7)

<sup>1</sup> Isarailinɔ kà Zini gbáan n pínɡi mɔ káaku guu, ben aɔ́ ṽé Kadesi. Gwen Miriamu gàn, wà à ṽi. <sup>2</sup> Í kuu wà miro, ben aɔ́ kàkɔ́a Musa kɔn Arunaozi. <sup>3</sup> Aɔ́ zɔka kà Musazi wà bè: Tó wa gaga yā kɔn gbē kè aɔ́ gàga Dii aenɔ, le beee s̃aɔ́. <sup>4</sup> Bóyānzi a mɔwao gbáa kèkiin le wà gaga kè kɔn wa pókādeenɔzi? <sup>5</sup> Bóyānzi a bɔɛwao Igipiti a mɔwao gu zaaa kè guuzi? Pówɛɛ ke kākā lí ke geepi bɛɛ ke biisioo kú kèro, bens̃ í kú kè wà miro. <sup>6</sup> Musa kɔn Arunao parii tò aɔ́ gàa dakɔreki kpɛɛɛa aɔ́ dàe n puua, ben Dii gakui b̀ò à m̀ñzi. <sup>7</sup> Dii yā ò Musane à bè: <sup>8</sup> Ñ gò sé, mpi kɔn n ṽi Arunao à gbē p̃inɔ kakɔ́a à yā o gbèsi kèk̃aañe ñ wáa, í é bɔn. Len né í bɔñne gbè p̃in aɔ́ mi le kɔn ñ pókādeenɔ.

<sup>9</sup> Musa gò sè Dii aezĩ lán à òne nà. <sup>10</sup> Musa kɔn Arunao ñ kákɔ́a gbèsi p̃i ae, ben à bènñe: À ma a swāgbāadeenɔ! Á yezi wà í bɔare gbè kèkii guun yó? <sup>11</sup> Ben Musa ɔ́ sè musu à gbè p̃i lè kɔn a gòo gèn plaa. Í b̀ò maamaa, ben aɔ́ mì kɔn ñ pókādeenɔ.

<sup>12</sup> Ben Dii bè Musane kōn Arunao: Zaake ée ma náane ke a ma tó bò Isarailinɔnero, é gēnyo būsuo kè mée kpaammanlo. <sup>13</sup> Meriba íbokiin gwe, guu kè Isarailinɔ zɔka kàn Diizi, ben à a ludakεε òdɔańne.

*Edɔmunɔ gina Isarailinɔne aɔ bɔε kōn n būsuo*

<sup>14</sup> Musa gbēnɔ zì aɔ bò Kadεsi wà gàa Edɔmunɔ kína kiia aɔ bè: Wamɔwa n danε Isarailinɔ bè, n nawēa kè à wa leenɔ dɔ píngi. <sup>15</sup> Wa dezinɔ gàa Iyipiti, ben wa gí kè gwe. Iyipitinɔ ía dàwa kōn wa dezinɔ. <sup>16</sup> Wa wii pè Diizi, ben à yā sìwao. À a Malaika zì à bòwao Iyipiti. Tia sa wá kú Kadεsi, n būsuo lézekiia. <sup>17</sup> N̄ wa gba zé wà bɔε kōn n būsuo. Wé gē buraanɔ ke geepi búnnlo, wé a lògɔ'i miro. Wégɔ té kína zédaa guumε. Wé lie ɔplazi ke ɔzeziro ai wà gá gēteo n būsula. <sup>18</sup> Ben Edɔmunɔ bèńne: É e à bɔε kōn wa būsuro. Tó a gi, wé bɔ wà daale kōn fēdaao. <sup>19</sup> Isarailinɔ bèńne: Wé bɔε kōn zédaaomε. Tó wapinɔ ke wa pókādeenɔ a í m̄, wé à fīa bo. Wá yezi wà bɔemmε pā. <sup>20</sup> Edɔmunɔ bè: É e à gēro. Ben aɔ zìkarinɔ bɔε paripari aɔ m̄ dańle kōn gbāaa. <sup>21</sup> Zaake Edɔmunɔ gí Isarailinɔne aɔ gē kōn n būsuo, ben Isarailinɔ pāńne.

*Aruna gana*

<sup>22</sup> Isarailinɔ bò Kadεsi n píngi aɔ kà Oru kp̄ii kiia <sup>23</sup> Edɔmunɔ būsuo lézekiia. Gwen Dii yā òn Musane kōn Arunao à bè: <sup>24</sup> Aruna é ká a dezinɔla tia, eé gē būsuo kè mée Isarailinɔ gbaa guuro, kè a gɔɔn plaaa a gi ma yā mazi zaa Meriba yānz̄i. <sup>25</sup> N̄ Aruna kōn a né Elεazao sé n̄ didińyo Oru kp̄iia <sup>26</sup> n̄ Aruna pókāsāanɔ bɔεa n̄ da à né Elεazane gwe. Gwen Aruna é gan à ká a dezinɔla.

<sup>27</sup> Musa kè lán Dii òne nà. À dìdi Oru kpiiia gbēno wáa píngi <sup>28</sup> à Aruna pókásáano b̀eà à dà à né Eleazane, ben Aruna gà kpii pi musu gwe. Kè Musa kōn Eleazao p̀ta kpii p̀a <sup>29</sup> bensō Isarailino mà kè Aruna gà, ben aō à gè sósobi kè gurō baaakuri.

## 21

### *Z̀iblena Kanaanō Nēgevi b̀sun*

<sup>1</sup> Aradi kè kú Nēgevi b̀sun kína né Kanaa gbēme. Kè à mà Isarailino té Atarimu zén aōe mo, ben à b̀ à dànlē kōn z̀io à n gbēkeno k̀k̀. <sup>2</sup> Ben Isarailino l̀ sè Diine wà b̀: Tó n gbē p̀no nàwe wa ozi, wé n wéteno kaate mámmam. <sup>3</sup> Dii Isarailino yā mà, ben à Kanaa p̀no kp̀ámma. Aō n káate kōn n wéteno píngi, ben wà tó kp̀a guu p̀ne ooma.

### *M̀gotē ml̀*

<sup>4</sup> Kè aō f̀e Oru kpii pi kiia, aō Isia Tēa zé sè le wà p̀ Edomuno b̀sune. Ben aō f̀ menaa zén <sup>5</sup> aō Luda kōn Musao taari è wà b̀: B̀yānzin a b̀wao Igipiti le wà gaga gbáan k̀zi? P̀blee kuuro, í kuuro, wa za p̀ble gina k̀n. <sup>6</sup> Ben Dii ml̀ p̀sino z̀ímma aō n léle, ben aō gaga paripari. <sup>7</sup> Gbēno m̀ Musa kiia wà b̀: Wa durun kè, zaake wa Dii kōn mpio taari è. N agbaa kp̀anewe le à wa k̀k̀a kōn ml̀ k̀no. Ben à agbaa kp̀anéne. <sup>8</sup> Dii b̀ne: N ml̀ pi n logo lía n p̀e. Tó ml̀ gbē l̀, tó à wéé sè à gwà, eé aafia e. <sup>9</sup> Ben à m̀gotē pi ml̀ ũ à lògo lía à p̀e. Tó ml̀ gbē l̀ bensō à wéé sè à m̀gotē ml̀ pi gwà, è aafia e.

### *Isarailino p̀ana Edomu kōn M̀abuno b̀sunone*

10 Isarailinɔ dà zén, ben aɔ bùra kàe Obo. 11 Bɔna Obo aɔ gàa wà bùra kàe Ie'abarimu gbáan Mɔabunɔ bùsu ɔfántɛbɔe kpa. 12 Bɔna gwe aɔ gàa wà bùra kàe Zeredi guzurɛn. 13 Bɔna gwe aɔ bùra kàe Anɔ baa kãa kpa, gbáa kè kú Amɔrinɔ bùsu lézekiia. Anɔ pìn Mɔabu kɔn Amɔrinɔ bùsunɔ lézekii ũ. 14 Beee yānzin wà bè Dii zìkatakada guu: Waebu kè kú Sufa bùsun kɔn Anɔ swa'ɔnenɔ 15 kɔn n̄ guzure kè tà ai Aranɔ Mɔabunɔ bùsu lézekiio. 16 Bɔna gwe dɔ aɔ gàa Lògɔ, guu kè Dii bèn Musanɛ: N̄ gbɛnɔ kakɔa mà í kparímma. 17 Gwen Isarailinɔ lè kèkii sìn:

Í bɔ lògɔn, gbasa wà lè síne,

18 lògɔ kè wa dɔn'aedeenɔ yɔ kɔn línɔ,

lògɔ kè wɛɛnenɔ pà kɔn n̄ gònɔ.

Bɔna gbáan aɔ gàa Matana. 19 Matana gbera Nalieli, Nalieli gbera Bamɔ. 20 Bamɔ gbera guzure kè kú Mɔabunɔ bùsun, guu kè Pisiga mìsɔntɛ ae dɔ gbáaa.

### *Zìblena Siɔ kɔn Oguoa*

21 Isarailinɔ gbɛnɔ zì Amɔrinɔ kí Siɔa aɔ bè: 22 N̄ wa gba zé wà bɔe kɔn n̄ bùsuo. Wé gɛ buraanɔ ke geepi búnɔnlo, wé a lògɔ'i miro. Wégɔ té kína zédaa guume ai wà gá gɛteɔ n̄ bùsula. 23 Siɔ e n̄ gba zé aɔ gɛte a bùsunlo. À a zìkarinɔ kàkɔa n̄ píngi, aɔ bɔe wèe gaañzi gbáan. Kè aɔ kà Yaza, aɔ zì kà kɔn Isarailinɔ, 24 ben Isarailinɔ n̄ déde kɔn fɛɛdaao aɔ n̄ bùsu sírɛmma zaa Anɔ ai Yabokuzi Amɔninɔ bùsun, zaake Amɔninɔ bùsu lézekii pì pāsī, è sí gɛnlo. 25 Isarailinɔ Amɔri wétɛnɔ s̄ píngi kɔn Esebɔo kɔn a lakutunɔ píngi, ben aɔ vɛɛn. 26 Esebɔn Amɔrinɔ kí Siɔ wétɛdaa ũ. Siɔ zì kà yā kɔn Mɔabunɔ kína káakuo, ben à à bùsu s̄ia ai Anɔ swaazi. 27 Beee yānzin kerɛnɔ è be:



À mós Esebō,  
wà Siō wétēdaa pì keke wà káe!

<sup>28</sup> Té bò Esebō yā,

zìkarinò bò Siō wéte pì guu,  
aō Mɔabunò b̀usu wétēda Ara kàate  
Anò mì s̀s̀i gbē p̀inò.

<sup>29</sup> Wāiyoo Mɔabunò!

Kemosi gbàgbārinò, a kaateme!

Kemosi tò a gōgbēnò f̀aakōa,  
à a nōgbēnò kpà Amōrinò kí Siōa z̀iz̀onò ũ.

<sup>30</sup> Ben wa ñ fú,

wa ñ déde zaa Esebō ai Dibō.

Wa ñ káate ai Nɔfa k̀on Mēdebaò.

<sup>31</sup> Len Isarailinò v̀ēē Amōrinò b̀usun le. <sup>32</sup> Musa  
gbēnò z̀i Yaza asii gwa, ben Isarailinò gwee si k̀on  
à lakutunò p̀ingi, aō p̀e Amōri k̀e aō kú gweeno.

<sup>33</sup> Ben Isarailinò liē aō Basā zé s̀e. Ben Basā kí  
Ogu gàañzi k̀on a z̀ikpēenò ñ p̀ingi aō z̀i k̀ányo Ederēi.

<sup>34</sup> Dii bè Musane: Ǹton v̀ia kenero, zaake ma à ǹanne  
n z̀i k̀on à gbēnò k̀on à b̀usuo p̀ingi. Ǹ kene lán ñ k̀e  
Amōrinò kí Siō k̀e kí blè Esebōne nà. <sup>35</sup> Ben aō Ogu  
dè k̀on à ǹenò k̀on à z̀ikpēenò ñ p̀ingi, baa gbē m̀en  
doo e b̀oro, ben aō à b̀usu p̀i s̀i.

## 22

### *Mɔabunò kí Balaki Balamu sisina*

<sup>1</sup> Isarailinò dà z̀en, ben aō b̀ura kàe Mɔabunò b̀usu  
s̀en Yoda baa k̀aa k̀e ae d̀o Yerikoa kpa. <sup>2</sup> Zipo né  
Balaki Mɔabunò k̀ina è lán Isarailinò k̀e Amōrinone  
nà, <sup>3</sup> ben sẁē k̀ē Mɔabunon, v̀ia ñ k̀ū Isarailinò  
parikēe yānzi. <sup>4</sup> Ben Mɔabunò bè Midiā gbēnsinone:  
Pari k̀ekii é p̀ó k̀e ligawaziinò ble p̀ingi lán z̀ù è s̀ē

ble nà. <sup>5</sup> Ben Balaki gbě̀nɔ zĩ Bɛɔ né Balamua ai Peto, Yuflatì sae à bɛ̀ b̀sun. À b̀ɛ̀nne aɔ̀ à sísi à m̀ó aɔ̀ bene: Gbě̀kenɔ̀ b̀ò Igipiti aɔ̀ dàgula aɔ̀ káe ma sae. <sup>6</sup> N yá nna! Ñ m̀ó ñ ñ káme, zaake aɔ̀ gbáaa demala. Wègɔ̀ d̄oro ke mé e mà zĩ blemma mà p̄́rmà b̀usu kèn gwɛɛ. Má d̄ó kè gbě̀ kè n sa maaa òne égɔ̀ de aubarikadee ùme. Gbě̀ kè s̄ó n sa zaaa òne, eégɔ̀ de kana p̀ó ùme.

<sup>7</sup> Mɔabu k̄n Midia gbě̀nsinɔ̀ dà zén, aɔ̀ m̀asokena gbaa kè aɔ̀é da Balamunɛ k̄na. Kè aɔ̀ kà à kiia, aɔ̀ yá kè Balaki ñ z̄io òne. <sup>8</sup> À b̀ɛ̀nne: À i kè, mé yá kè Dii é omɛɛ oare. Ben Mɔabu k̄ne p̄nɔ̀ ì Balamu bɛ. <sup>9</sup> Ben Luda b̀ò à m̀ò Balamuzi à à là à b̀è: Dénɔn gbě̀ kè aɔ̀ kún̄yo kèkiinɔ̀ ũ? <sup>10</sup> À wè̀la à b̀è: Zipo né Balaki, Mɔabunɔ̀ k̄na bé à ñ z̄ima. Aɔ̀ b̀è <sup>11</sup> gbě̀ kenɔ̀ b̀ò Igipiti aɔ̀ dàgula. Ben à b̀è mà m̀ó mà ñ káare lɛ̀ à e à zĩ blemma à p̄́rmà. <sup>12</sup> Ben Luda b̀ene: Ñton ténziro. Ñton sa zaaa oñnero, zaake ma aubarika dàngu k̀ò. <sup>13</sup> Kè Balamu f̄ɛ k̄ngɔ̀, à b̀è Balaki k̄nenɔ̀ne: À tá a b̀sun, zaake Dii ḡime mà téazi. <sup>14</sup> Ben Mɔabu k̄ne p̄nɔ̀ f̄ɛ wà tà Balaki kiia aɔ̀ b̀è: Balamu ḡi m̀waozi.

<sup>15</sup> Balaki èara à k̄ne p̄andenɔ̀ zĩ d̄o, aɔ̀ pari k̄n ñ gakuio de gbě̀ káakunɔ̀la. <sup>16</sup> Kè aɔ̀ kà Balamu kiia, aɔ̀ b̀è: Zipo né Balaki b̀è ñton tó p̀oke kp̄anne k̄n m̀ona a kiiaoro, <sup>17</sup> zaake eé gbaa kenne maamaa. P̀ó kè ñ òne p̄ngi é ke. N yá nna! Ñ m̀ó ñ gbě̀ p̄nɔ̀ káme. <sup>18</sup> Ben Balamu b̀è Balaki z̄iri p̄nɔ̀ne: Baa tó Balaki kondogi k̄n vura kè kú a b̄ɛɔ̀ kp̄ama p̄ngi, mé f̄ó mà b̀o Dii ma Luda yá kp̄ero, baa féte. <sup>19</sup> À i kè gw̄av̄ia lán gbě̀ káakunɔ̀ kè nà ai mà ma d̄o yá

kè Dii é kaaramε. <sup>20</sup> Luda bò à m̀òzi gwãavĩ à bène: Zaake gbẽ k̀eǹò m̀ò n sísi, ǹ fεε ǹ gányo, m̀ode yã k̀è mé oon ǹ kε.

### *Balamu zaaki yã'ona*

<sup>21</sup> Balamu fεε k̀ong̀ò à g̀àari ỳi a zaakinε, ben à g̀aa k̀õn M̀oabu k̀ine p̀iǹo. <sup>22</sup> Luda p̀ò f̀è à gana ỳanzi, ben Dii Malaika g̀aa à zε à zé z̀õnε. Balamu di a zaaki kpεε, à z̀ĩkeri g̀õõn plaaaǹõn téo. <sup>23</sup> K̀è zaaki p̀i è Dii Malaika zεna zé guu à f̀εdaa ẁòto à k̀ũna, ben à liε s̀èn. Balamu à lè, ben à èara à dà zén. <sup>24</sup> Dii Malaika g̀aa à zè zé wéwεn geepi líkpε k̀è gbè kara ligaziǹo dagura. <sup>25</sup> K̀è zaaki p̀i Dii Malaika è, à nà g̀ũa à Balamu gbá l̀ò. Ben Balamu èara à à lè d̀o. <sup>26</sup> Dii Malaika èara à g̀aa aε d̀o à zè gu kpaatogoo k̀è liεkii v̀iroom. <sup>27</sup> K̀è zaaki p̀i Dii Malaika p̀i è, à k̀uε k̀õn Balamuo. Ben Balamu p̀ò f̀è à à lè g̀òo. <sup>28</sup> Ben Dii zaaki p̀i gbà lé à yã ò Balamunε à bè: Bón má k̀ennε n ma lε ai g̀èn aagõõ? <sup>29</sup> Balamu wèàla à bè: K̀è n ỳõnkoyã k̀emε ỳanzimε. Tó má f̀εε k̀ũna, lε ma n de g̀õ. <sup>30</sup> Ben zaaki p̀i bène: N zaaki k̀è nὲgõ diia gur̀o s̀ãnda p̀ingia m̀õna gbãan ma ũroo? Má k̀ennε lε zikió? À bè: Auo. <sup>31</sup> Ben Dii Balamu wéε k̀ennε, à à Malaika è zεna zén à f̀εdaa ẁòto à k̀ũna. Ben à k̀uε à mì p̀èε.

<sup>32</sup> Dii Malaika à là à bè: Bóyãnzin n n zaaki lè ai g̀èn aagõzi? Ma m̀ò zé z̀õnnεmε, zaake n wãmε. <sup>33</sup> K̀è zaaki p̀i ma e, ben à liεmε ai g̀èn aagõ. Tó èε liεmε yãro, lε ma n de ma à tò. <sup>34</sup> Balamu bè Dii Malaika p̀ine: Ma durun k̀è, zaake má dõ k̀è n zé z̀õmεro. Zaake ma gana k̀ennε zaa, mé εara mà tá. <sup>35</sup> Ben Dii Malaika bè Balamunε: Ǹ gá k̀õn gbẽ p̀iǹo, yã k̀è

mé dannεen ò o. Ben Balamu gàa kǝn Balaki kíne pìnɔɔ.

<sup>36</sup> Kè Balaki mà Balamu e mɔɔ, ben à gàa à dààle wéte kè kú Anɔ baa, Mɔabunɔ bùsu lézekiia. <sup>37</sup> Ben à bè Balamunε: Kè ma gbēnɔ zǝ wà n sísi yǎ, à kè dia néε móroo? Mé fɔ mà gbaa kennεnloo? <sup>38</sup> Balamu wèàla à bè: Ma mɔ sa, mɔde má yǎ sǎnda píngi ona zé vǝro. Yǎ kè Luda é damεen mé o. <sup>39</sup> Ben Balaki gàa kǝn Balamuo Kiria'uzo. <sup>40</sup> À saa ò kǝn zùnɔ kǝn sǎanɔ à à nɔbɔ kpà Balamua kǝn kíne kè aɔɔ kúo lεdoonɔ. <sup>41</sup> Kè guu dɔ, à Balamu sè à gàao Bamɔ Baali. Gwen Balamu Isarailinɔ bùra kpadoo èn.

## 23

### *Balamu yǎ káaku kè à è ona*

<sup>1</sup> Balamu bè Balakine: Ñ gbǎgbǎkii bomε kè mèn swεεplaa, ò mómε kǝn zùswareenɔ mèn swεεplaa kǝn sǎkaronɔ mèn swεεplaa. <sup>2</sup> Balaki kè lán Balamu òne nà, ben aɔ saa ò kǝn zùswareeo kǝn sǎkaroo gbǎgbǎkii pìnɔa píngi. <sup>3</sup> Ben Balamu bène: Ñ ze n sa'opɔzi. Mé gá mà gwa tó Dii é mó yǎ omε, mé yǎ kè eé omεε onne. Ben à gàa à zè gu lezǝ gbáagbaaa. <sup>4</sup> Luda mò à à lè, ben Balamu bène: Ma gbǎgbǎkii bò mèn swεεplaa, ben ma saa òmǝma píngi kǝn zùswareeo kǝn sǎkaroo. <sup>5</sup> Dii yǎ dànε à lén, ben à bè: Ñ εara ò gá ò Balaki le ò onε lán má dànne nà. <sup>6</sup> Ben à εara à gàa à à lè zena a sa'opɔzi kǝn Mɔabu kíneenɔ ò píngi, <sup>7</sup> ben à yǎ kè à è ò à bè: Mɔabunɔ kí Balaki ma sisi Siria bùsun, ben ma bɔ ɔfǎntēbɔε kpa kpíiinɔ kiia ma mɔ. À bè mà bɔare Isarailinɔ kpεε, mà mó mà sa zaaa oare Yakubu borii pìnɔne.

<sup>8</sup> Mé ke dia mà gbě kè Luda e ñ károonɔ káa?  
 Mé ke dia mà bɔ gbě kè Dii e bɔ ñ kpεeroonɔ kpεεε?

<sup>9</sup> Zaa kp̄ii m̄is̄ont̄ēan m̄ée ñ ee,  
 zaa gulez̄ian m̄ée w̄ée siiñle.

Gbě p̄inɔ kú ñdona,  
 āñ ñ z̄inda dīe ñdona k̄on bori p̄andenɔ.

<sup>10</sup> Yakubu boriinɔ pari lán b̄usu'āatē bà,  
 weé f̄s̄ wà Isarailinɔ naro wà ñ lé d̄s̄ro.  
 Luda tó ma gaa ḡs̄ de lán a gb̄enɔ p̄ó bà,  
 ma yāana ḡs̄ de lán ñ p̄ó bà.

<sup>11</sup> Ben Balaki bène: Ñ k̄eme dian gwee? Ma m̄onyo  
 le ñ ma ib̄eenɔ k̄ame, ben sa m̄aaan ñ òñneó? <sup>12</sup> À  
 wèlà à bè: Yā kè Dii d̄ame ma lénn mé oroo?

*Balamu yā plaadee kè à è ona*

<sup>13</sup> Balaki bène: Ñ m̄ó wà gá gu p̄andea, guu kè né  
 ñ en. Ñ ñ k̄ame gwe, zaake āñ kp̄adon né e, né ñ e ñ  
 píngiro. <sup>14</sup> Ben à ḡaao gud̄akparinɔ guun Pisiga kp̄ii  
 m̄is̄ont̄ēa. À gb̄āgb̄ākii b̄ò gwe m̄en sw̄εεplaa, ben à  
 saa òm̄ma píngi k̄on z̄uswareeo k̄on s̄akaroo. <sup>15</sup> Ben  
 Balamu bène: Ñ ze n sa'op̄zi kè, mé gá mà à le gwe.

<sup>16</sup> Ben Dii mò à yā d̄ane à lén, ben à bène: Ñ εara ñ  
 gá ñ Balaki le ñ on̄e lán má d̄anne nà. <sup>17</sup> Ben à εara à  
 ḡaa à à lè zena a sa'op̄zi k̄on M̄ababu k̄inenɔ. Balaki  
 à là à bè: Dii bè diam̄e? <sup>18</sup> Ben à yā kè à è ò à bè:

Zipo né Balaki,  
 ñ sw̄a kp̄á ñ ma yā ma!

<sup>19</sup> Luda né gb̄ēnteenlo gbasa à εεε to,  
 è n̄s̄e līe lán bus̄ansi bàro.  
 Eé gí yā kè à ò kezió?

Eé gí lé kè à gb̄ēñne papazió?

<sup>20</sup> À bème mà sa m̄aaa oñneme.

À aubarika dàngu, mé f̄s mà gíro.

<sup>21</sup> Mée yā zaa ke e Yakubu boriinɔaro,  
mée yā'ɔamma ke e Isarailinɔaro.

Dii n̄ Ludaa kúnyo,

āsè à kíkε tó bɔ n̄ té.

<sup>22</sup> Luda n̄ b̄sε Igipiti,

ās gbāaa vī lán zùs̄εtε bà.

<sup>23</sup> Weé f̄s wà pó da Yakubu boriinɔaro,

weé f̄s wà àisi zaaa kpá Isarailinɔziro.

Zaa gbàa weégae o n̄ yā musu,

kè yā kè Ludaa kèn gwe.

<sup>24</sup> Borii p̄i è f̄ε lán músudaa bà,

è a z̄inda sé lán musukya bà.

È daεro ai à gá pó k̄u à só,

ai à gá pó kè à d̄enɔ aru mio.

<sup>25</sup> Balaki bène: N̄ton n̄ káro. N̄ton sa maaa ōne sero. <sup>26</sup> Balamu bène: Mée onne kè yā kè Dii d̄am̄εen mé oroo?

### *Balamu yā aaḡs̄dee kè à è ona*

<sup>27</sup> Balaki bè Balamunε: N̄ m̄ó sa, mé gányo gu p̄andea. Wèḡs̄ d̄oro tó eé ke Ludanε n̄ gb̄ε p̄inɔ káme

gwe sa. <sup>28</sup> Ben Balaki ḡaao Peo kp̄iii musu kè aε d̄o

gbáaa. <sup>29</sup> Balamu bène: N̄ gb̄āgb̄ākii bome kè mèn

sw̄εεplaa, n̄ m̄ómε k̄n zùsw̄areenɔ mèn sw̄εεplaa

k̄n s̄ākaronɔ mèn sw̄εεplaa. <sup>30</sup> Balaki kè lán à òne

nà à saa òm̄ma k̄n zùsw̄aree p̄inɔ k̄n s̄ākaro p̄inɔ.

## 24

<sup>1</sup> Kè Balamu è sa maa ona Isarailinɔne kà Diin, èe gá màso ke lán yāa bà d̄oro, ben à aε d̄o gbáaa. <sup>2</sup> Kè à w̄éε zù, ben à Isarailinɔ è kaena n̄ boriia. Luda Nini p̄itaa, <sup>3</sup> ben à yā kè à è ò à bè:

Bεο né Balamu yān yè,  
 mamoma kè ma wée kēna yān yè.  
 4 Mamoma kè mεè Luda yā ma yān yè.

Ma Gbāapingide wéεgupu è,  
 má daena ma puua, ma wée wēna.  
 5 Yakubu boriino bùrakaena maa fá!  
 Isaraili bisakutaano maa!

6 Aō kaena lán guzure dākono bà,  
 lán swa dōro kara búno bà.  
 Aō de lán zà lí kè Dii bāno bà,  
 lán sida lí kè aō kú í saeno bà.

7 Í é ní orozāno pa yélele,  
 aō pótōnāno é í e maamaa.  
 Aō kína gbāaa égō de Agagala,  
 aō kpata é tó bo.

8 Luda ní bōε Igipiti,  
 aō gbāaa vī lán zūsēte bà.  
 Aōè zì ble borii kè aō íbete kpànyonōa,  
 aōè ní wāno wíwi aōè ní pápa kào.

9 Aōè sōpεε wà dae lán músu bà,  
 dé bé eé fō à ní fεεε?  
 Luda aubarika da gbē kè aōé sa maaa oñnenon,  
 à gbē kè aōé sa zaaa oñnenon ká.

10 Balaki po fē Balamuzi à onetee dāa à bè: Ma  
 ibεeno kana yānzin ma n sisizi, ben n sa maaa òñne  
 gèn aagōó? 11 N tá n be tia gōo. Ma bè mé gbaa  
 kenneme yā, mōde Dii ginne n láada e. 12 Balamu  
 bène: Mée o gbē kè n ní zīmaanōneroo! 13 Ma bè baa  
 tó n ma gba n beε kè pana kōn kondogio kōn vuraο,  
 mé bo Dii yā kpεε mà yā ke kōn ma zīnda poyezioro,  
 à maaa ke à zaaa. Yā kè Dii bè mà oon mé o. 14 Mée  
 taa ma gbēno kiia sa. N mó mà onne lán gbē pino é  
 ke n gbēno nà zia.

*Balamu yā siig̃dee kè à è ò à bè*

15 Ben Balamu yā kè à è ò à bè:

Bεο né Balamu yān yè,  
mamɔma kè ma wée kēna yān yè.

16 Mamɔma kè mεè Luda yā ma yān yè.

Má Luda Musude nòseguuyā d̃.  
Ma Gbāapingide wéegupu è,  
má daena ma puua, ma wée wēna.

17 Mée Isarailinɔ ee, èe ke tianlo,  
mée n̄ gwaa, à gurɔɔ e ká gīaro.  
Sɔsɔne é bɔ Yakubu boriinɔ té,  
kpatableri é bɔ Isarailinɔ té,  
eé Mɔabunɔ mì wíwi,  
eé zɔkakarì pìnɔ mìwatoro f̃f̃.

18 Eɔmunɔ bùsu é g̃ à p̄ ó ũ,  
à ibεε Sei bùsu é g̃ à p̄ ó ũ,  
Isarailinɔ gbāaa é g̃ kaaramε.

19 Yakubu bori ke é kí bleńma,  
eé gbē kpaaa kè ã g̃nɔ kaate.

20 Balamu Amaleki boriinɔ è, ben à yā kè à è ò à bè:  
Amaleki boriinɔ né boriinɔ m̄deemε,  
m̄de ãé kaate zāa.

21 Kè Balamu Keninɔ è, ben à yā kè à è ò à bè:  
A kúkii gbāa g̃ing̃in,  
a sà kú gbè musu.

22 Baa k̄n beeeo weé a kaatεmε,  
Asirianɔ é a kúkū z̄iz̄nɔ ũ.

23 Balamu yā kè à è ò d̄ à bè:  
O'o, tó Ludaa kè le, dé bé eé bɔɔ?

24 Góro'itenɔ é bɔ Sipiru bùsun,  
ãé z̄i ble Asirianɔ k̄n Eberunɔa,  
m̄de ãp̄inɔ é kaatεmε se.

25 Balamu f̄ε à tà a bε, ben Balaki dà zén se.



**Luda yá takada kǝn Bokobaru yǎo**  
**The New Testament and portions of the Old Testament**  
**in the Bokobaru language of Nigeria**

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

---

PDF generated using Haiola and XeLaTeX on 11 Nov 2022 from source files dated 9 Oct 2020

c31548a1-5316-53c2-be42-674e0e4c5ae5